

Remaja 14 tahun ditahan ambil ketum

Oleh NORHAFIZAN ZULKIFLI | 31 Januari 2023, 2:28 pm



Ramli (kanan) menunjukkan lokasi penagihan dadah yang terdapat di Pahang pada sidang akhbar Ops Tapis Khas SeMalaysia di IPK Pahang, Kuantan, hari ini.

KUANTAN – Remaja berusia 14 tahun antara 450 orang yang ditangkap dalam Ops Tapis Khas SeMalaysia Siri Pertama 2023 Jabatan Siasatan Jenayah Narkotik (JSJN) Ibu Pejabat polis Kontinjen (IPK) Pahang yang diadakan pada 25 hingga 27 Januari lalu.

Ketua Polis Pahang, Datuk Seri Ramli Mohamed Yoosuf berkata, remaja terbabit ditahan di bawah Seksyen 30 (3) Akta Racun Berbahaya 1952 atas kesalahan mengambil ketum.

“Remaja terbabit yang sudah tidak lagi bersekolah ditahan di sebuah lokasi penagihan dadah di Jerantut bersama tiga rakannya yang mana seramai 51 orang turut ditahan di bawah akta sama dalam operasi yang dijalankan serentak di 11 daerah di negeri ini,” katanya dalam sidang akhbar di IPK Kuantan hari ini.

Dalam pada itu Ramli berkata, JSJN telah berjaya menggempur 28 lokasi penagihan dadah dengan 287 serbuan serta 532 pemeriksaan dilakukan dalam operasi berkenaan.

Katanya, daripada 450 penagih yang ditangkap, 446 daripadanya adalah lelaki dan empat daripadanya adalah perempuan berusia antara 14 dan ke atas.

“Mereka yang berusia antara 25 hingga 34 tahun antara yang paling ramai ditahan iaitu seramai 170 orang.

“Daripada jumlah itu juga, seramai 35 orang merupakan pengedar dadah, 12 daripada merupakan individu dikehendaki,” katanya.

Tambahnya lagi, daripada tangkapan itu juga, salah seorangnya merupakan seorang penjawat awam dipercayai bertugas sebagai pembantu kesihatan di sebuah hospital di Bentong.

Katanya lagi, sebanyak 57.72 gram syabu, 1,016.8 gran heroin, 17.99 gran ganja, 9.81 gram pil eramine 5, 31.17 gram pil yaba, 9.2 gran pil psikotropik dan 107.63 liter air ketum dengan keseluruhan sebanyak 1,142.69 gram dadah bernilai RM27,014 berjaya dirampas.

“Turut dirampas dalam operasi berkenaan ialah wang tunai bernilai RM470, sebuah motosikal bernilai anggaran RM7,000 di mana ia menjadikan keseluruhan nilai rampasan sebanyak RM34,484,” katanya.

Sementara itu beliau berkata, Ramli juga berkata, seramai 1,470 orang ditangkap atas kesalahan dadah setakat Januari tahun ini di mana berbanding tahun lalu dalam tempoh sama seramai 1,405 orang ditangkap sekali gus menunjukkan peningkatan seramai 65 orang.

“Ini merupakan operasi pertama bagi tahun jni dan operasi seumpama ini akan diteruskan untuk membasmi permasalahan dadah, perlencongan sosial dan substans di negeri ini,” ujarnya. – KOSMO! ONLINE